

lieutenant qui estoit suivy de ses archers marchans par rang , portant chascun la hallebarde , vestus de casaques rouges et de livrées, au doz desquelles estoit embossée en broderie une main tenant une espée blanche et argentée.

Puys suyvoient douze torches ardantes portées par douze citadins où pendoient les armoyries de Monseigneur le Révérendissime Arcevesque de Lyon (1) , après lesquelles suyvoient six autres torches de sainte Croix, et douze où pendoient les escussons et armoyries de la ville, et douze autres grosses où pendoient les armoiries du Roy , portées par sergens royaulx ; et tous alloient deux par rang.

Voicy le commencement des gens d'esglise.

En premier lieu estoient les Minimes, après les Observantins, puys les Augustins, puys les Carmes, puys les Cordelliers, puys les Jacopins (sic).

Et , après tous les religieulx, marchoient les soldatz harquebouziens de la garde de Monsieur de Chambéry, cappitaine de la citadelle, suyvys des cinquante arquebouziens de la garde de Monsieur le Gouverneur, conduictz par le cappitaine Navaille (2)

Après lesquelz toutes les paroisses de Lyon ensemble avec les esglises collegialles suyvoient en grand nombre d'enfans de cœur et de prebstres chantans et psalmodians avec les chanoynes de Sainet Nizier et de Sainet Paul. Et tous les derniers estoient les chanoynes sieurs et comtes de Sainet Jehan, suyviz des quatre bastonniers.

Après lesquelz suyvoient les secretares de Monseigneur de Lyon.

Puys marchoit la bande des joueurs de viollons , touchans magnifiquement bien , estans suyvis de plusieurs cappitaines portans chascun son cierge blanc.

Après marchoient quatre enfans de cœur , ung peu esloignez d'eulx, portans chascun une longue torche clairante.

Puys suyvoit ung prebstre seul, lequel portait la crosse épiscopale devant le poille.

(1) Antoine d'Albon.

(2) Navailles (?).